

համարձակվում են մտնել հենց գյուղը և ողջ գյուղը կալի ժամանակ ծածկվում է դարմանի փոշիով: Տներին առջև տեղ-տեղ երևան են գալիս պարտեզներ: Այսպես են Արիքու գետի հովտում՝ Շաղաթն ու Բարձրավանը (Մաղրան): Որոտանի (Բազարչայի) վրա՝ Անգեղակոթն ու Սիսիանը (Սիսավանը) մի փոքր անանուն գետակի երկու ափերին՝ Բոնակոթը, որի տակ լայն բացվում է Սիսիան-Այրիգետ (Այրիչայ) գետերի միացած գետաբերանը: Սիսիան գետի ավազանում՝ Ալիուն (այժմ Սավարդը), Հացաշատը (նախկին Սիսիանը), Այրի գետի հովտում՝ Ախլաթյանը, Բնունիսն ու Տոլլորսը. գետաբերանի մոտ՝ Ուզը, Լորի հովտում՝ Լեոնաշենը (Շենաթաղն), Լորը, Դարբասը (Դարաբասն) ու Լծենը: Միայն Տաթևի տակից բխող աղբյուրներն են, որ չեն լայնացրել իրենց ափերը և իրենց կազմած վտակի լանջերին չեն հյուրընկալել ոչ մի գյուղ: Տաթև գյուղը քարագլխին բազմած իր վանքով, դիմացի Տանձատահն, ավելի վեր՝ Սվարանցը ազատ փռել են իրենց շենքերը փոքրիկ սարահարթի վրա, որը պաշտպանված է, գավառակի գետահովիտներում տեղավորված գյուղերի պես, քամիներից և նրանց պես օգտվում է բազմաթիվ աղբյուրների վճիտ և առատ ջրերից:

Սիսիանի գյուղերից մեծ մասը ամրոց չունի, ոչ էլ պաշտպանողական կամ դիտողական աշտարակ, չնայած որ շարունակ վտանգի մեջ է եղել Նախիջևանի կողմերից սպառնացող հարձակումներից: Վտանգի ժամանակ հնուց բնակչությունն իր գույքով և անասունով քոչել է հովիտների վերին կողմերը, կոնակը տվել Բարգուշատի լեռնաբազուկին և այնտեղ փակվել՝ կառուցելով ժամանակավոր ամրություններ հովիտների նեղ անցքերում: Նույնիսկ Տաթևի Օրբելյանները և Բոնակոթի Մելիք-Թանգյանները, ինչպես և Որոտանի (Բազարչայի) մյուս ափին Անգեղակոթի Սաֆրազբեկյանները չեն աշխատել վտանգի ժամանակ փակվել ամրոցի մեջ:

Կապանում, որը գավառի ամենամեծ և ամենաառողջ մասն է, որտեղ անտառները սկսվում են Շուռնուխի մոտից և համատարած շարունակվում են դեպի հարավ, մինչև Մեղրու (Զավնդուրի—Մեղրի-Գյունեի) լեռնաբազուկը, բացի այն վայրերից, որտեղ նրանք ոչնչացված են մարդու ձեռքով, գյուղերը տեղավորված են ծառերից ազատված հողամասերում: Այստեղ էլ անասնապահությունը և որսորդությունը վաղուց են ետ մղված հողամշակությամբ, որի համար կլիմայական պայմանները առանձնապես բարենպաստ են: Որոշ վայրերում անտառները փոխարինված են թփերիների պուրակներով, օրինակ՝ Ողջի գետի ստորին հովտում, հանքավայրերի կողքին:

Ներկա վարչական շրջանը ընդգրկում է առավելապես Բարգուշատի լեռնաբազուկի արևելյան ճյուղավորությունները: Այդ ճյուղավորություններից մեկը ձգվում է Կյամբիլ գագաթից (3417 մ) դեպի հարավ-արևելք. նրա արևելահայաց կողմին քսվում է Աճանան (Խալաջ կամ Հալաջ) գետը՝ Ողջի գետի ձախակողմյան օժանդակը, և լանջին գետեղված են Առաջածոր և Կավարտ գյուղերը: Ավելի հյուսիս նույն Կյամբիլից դեպի արևելք բազմած Խալաջ գագաթից բաժանվում են երկու այլ ճյուղավորություններ: Նրանցից աջակողմյանն Արջածորի (Առաջածորի) ճյուղավորության պես շեղվում է դեպի հարավ-արևելք և կոչվում է Կարմիր վաճի (Ղզըլ-վանքի) սարեր, նրա մի լանջին շարված են Ըոկենանց, Սևաբար և Արծվանիկ գյուղերը, հակառակ լանջին՝ Ուժանիսը և Նղվարդը: Զախակողմյան ճյուղավորությունը շարունակվում